

Da ... Dings aus ... Dings

A so a Kreiz is des mit d' Nåmen!
Aus 'n Hirn muaß ma si's kråmen,
si plågen, studieren, ma wü si zwingen,
do oft tuat 's net und net gelingen!

*„Stö da vur, de ... no, ..., de Dings
wohnt jetz beim ... Dings im Eckhaus links!
Der ... Dings, håst eam im Fernsehen g'segn?
Den håb i immer scho gern megn!
Der mit da ... Dings verheiråt' wår!
Es is scho guade fufzig Jåhr!“*

Sunst åber geht bei mir no åll's.
Senil, des bin i keinesfålls!
Nur mit d' Nåmen is' a G'frett!
Dir geht's a aso? I wett!

Du soist, so råten a'm de Schlauen,
dir a „Eselsbruckn“ bauen!
Båld g'schicht 's dånn, a wånn 's mir net g'fållt,
dass d' Bruckn stü ins Wåssa fållt.
Foigli kånn a nix mehr driber,
und der Esel, der bleibt iber!